

摘藻堂四庫全書薈要

史部

欽定四庫全書薈要

史部
元史卷七十九至
八十一

詳校官內閣侍讀臣孫球



欽定四庫全書蒼要卷六千四百五十八 史部

元史卷七十九

明翰林學士亞中大夫知制誥兼修國史宋濂等修

第二十九

輿服二

儀仗

皂纛

國語讀如禿

建纓于素漆竿凡行幸則先驅建纛夾以

馬鼓居則置纛于月華門西之隅室絳麾金塗竿上



施圓盤朱絲拂三層紫羅袋韜之 金節制如麾八層

韜以黃羅雲龍袋 引導節金塗龍頭朱漆竿懸五色

拂上施銅鈸 朱雀幢制如節而五層韜以紅繡朱雀

袋 青龍幢制如前韜以碧繡青龍袋 白虎幢制如

前韜以素繡白虎袋 玄武幢制如前韜以皂繡玄武

袋 爆稍制如節頂刻爆牛首有袋上加碧油 絳引

旛四角朱綠蓋每角垂羅文雜佩繫于金銅鈎竿竿以

朱飾懸五色間暈羅下有橫木板作碾玉文 告止旛

緋帛錯綵為告止字承以雙鳳立仗者紅羅銷金升龍
餘如絳引 傳教幡制如告止幡錯綵為傳教字承以
雙白虎立仗者白羅繪雲龍 信幡制如傳教幡錯綵
為信字承以雙龍立仗者繪飛鳳 黃麾幡制如信幡
錯綵為黃麾篆 龍頭竿繡髦竿如戟無鈎下有小橫
木刻龍頭垂朱綠蓋每角綴珠佩一帶末有塗金銅鈴
圍子制以金塗攢竹枝首貫銅錢而以紫絹冒之
副竿制以木朱漆之 火輪竿制以白鐵為小車輪建

于白鐵竿首輪及竿皆金塗之上書西天呪語帝師所
制常行為親衛中道正行在劈正斧之前以法佛衛以
祛邪僻以鎮轟雷焉蓋辟惡車之意也 豹尾竿制如
戟繫豹尾朱漆竿 寶輿方案緋羅銷金雲龍案衣緋
羅銷金蒙襯複案傍有金塗鐵鞠四龍頭竿結綬二副
之 香燈朱漆案黃羅銷金雲龍案衣上設金塗香爐
一燭臺二案旁金塗鐵鞠四龍頭竿結綬二副之 香
案朱漆案緋羅銷金雲龍案衣上設金香爐合各一餘

同香燈殿庭陳設則除龍頭竿結綬 詔案制如香案

冊案制如前 寶案制如前 表案制如香案上加

矮闌金塗鐵鞠四竿二副之緋羅銷金蒙複 禮物案

制如表案 交椅銀飾之塗以黃金 杌子四脚小床

銀飾之塗以黃金 鳴鞭綠柄鞭以梅紅絲為之梢用

黃茸而漬以蠟 鞭桶制以紫絁表白絹裏皮緣兩末

蒙鞍青錦緣緋錦複 水瓶制如湯瓶有益有提有

甬銀為之塗以黃金 鹿盧制如又字兩頭卷塗金粧

銀朱絲繩副之 水盆黃金塗銀粧銀為之 淨巾緋

羅銷金雲龍有裏 香毬制以銀為座上插蓮花爐爐

上罩以圓毬鏤網縕旋轉文于上黃金塗之 香合制

以銀徑七寸塗黃金銀雲龍於上 金拂紅犛牛尾為

之黃金塗龍頭柄 唾壺制以銀寬緣虛腹有蓋黃金

塗之 唾盃制以銀圓如缶有蓋黃金塗之 外辦牌

制以象牙書國字背書漢字填以金 外備牌制如前

中嚴牌制如前 時牌制同外備而小 版位制以

木長一尺二寸闊一尺厚六分白髹黑字 大繖赤質

正方四角銅螭首塗以黃金紫羅表緋絹裏諸繖蓋宋

以前皆平頂今加金浮屠 紫方繖制如大繖而表以

紫羅 紅方繖制如大繖而表以緋羅 華蓋制如繖

而圓頂隆起赤質繡雜花雲龍上施金浮屠 曲蓋制

如華蓋緋瀝水繡瑞草曲柄上施金浮屠 導蓋制如

曲蓋緋羅瀝水繡龍朱漆直柄 朱繖制如導蓋而無

文 黃繖制如朱繖而色黃 葆蓋金塗龍頭竿懸以

纓絡銷金圓裙六角葆蓋 孔雀蓋朱漆竿首建小蓋

蓋頂以孔雀毛徑尺許下垂孔雀尾簷下以青黃紅漑

水圍之上施金浮屠蓋居竿三之一竿塗以黃金書西

天呪語與火輪竿義同 朱圍扇緋羅繡盤龍朱漆柄

金銅飾導駕團扇鍍金線 大雉扇制稍長下方而上

攜緋羅繡象雉尾中有雙孔雀間以雜花下施朱漆橫

木連柄金銅裝 中雉扇制如大雉扇而減小 小雉

扇制如中雉扇而減小 青漑水扇制圓而青色四周

瀝水以青絹 畢朱滕結網二螭首銜紅絲拂中有獸

面朱漆柄金銅裝 罕制形如扇朱滕網中有獸面朱

漆柄金銅裝 旗扇錡即坐也旗錡制十字木于下上

四枝交拱置竅于其上以樹旗扇錡制如椀形小六木

拱于上而制作精于旗錡並漆以朱 風伯旗青質赤

火焰脚畫神人犬首朱髮鬼形豹汗胯朱袴負風囊立

雲氣中 雨師旗青質赤火焰脚畫神人冠五梁冠朱

衣黃袍黑襪黃帶白袴皂烏右手仗劔左手捧鐘 雷

公旗青質赤火焰脚畫神人犬首鬼形白擁項朱犢鼻

黃帶右手持斧左手持鑿運連鼓于火中 電母旗青

質赤火焰脚畫神人為女子形纁衣朱裳白袴兩手運

光 金星旗素質赤火焰脚畫神人冠五梁冠素衣皂

襪朱裳秉圭 水星旗黑質赤火焰脚畫神人冠五梁

冠皂衣皂襪綠裳秉圭 木星旗青質赤火焰脚畫神

人冠五梁冠青衣皂襪朱裳秉圭 火星旗赤質青火

焰脚畫神人冠五梁冠朱衣皂襪綠裳秉圭 土星旗

黃質赤火焰脚畫神人冠五梁冠黃衣皂襪綠裳秉圭
攝提旗赤質赤火焰脚畫神人冠五梁冠素中單黃
衣朱蔽膝綠裳仗劍 北斗旗黑質赤火焰脚畫七星
角宿旗青質赤火焰脚畫神人為女子形露髮朱袍
黑襪立雲氣中持蓮荷外仗角亢以下七旗並青質青
火焰脚角宿繪二星下繪蛟 亢宿旗青質赤火焰脚
畫神人冠五梁冠素衣朱袍皂襪皂帶黃裳持黑等子
外仗繪四星下繪龍 氐宿旗青質赤火焰脚畫神人

冠小冠衣金甲朱衣綠包肚朱擁項白袴左手仗劍乘
一鰲外仗繪四星下繪貉 房宿旗青質赤火焰脚畫
神人烏巾白中單碧袍黑襪朱蔽膝黃帶黃裙朱烏左
手仗劍外仗繪四星下繪兔 心宿旗青質赤火焰脚
畫神人冠五梁冠朱袍皂襪右手持杖外仗繪三星下
繪狐 尾宿旗青質赤火焰脚畫神人冠束髮冠素衣
黃袍朱裳青帶右手仗劍左手持弓外仗繪九星下繪
虎 箕宿旗青質赤火焰脚畫神人烏巾衣淺朱袍皂

襴仗劔乘白馬于火中外仗繪四星下繪豹 斗宿旗

青質赤火焰脚畫神人被髮素腰裙朱帶左右持杖外

仗斗牛以下七旗並黑質赤火焰脚斗宿繪六星下繪

獬 牛宿旗青質赤火焰脚畫神人牛首皂襴黃裳皂

烏外仗繪六星下繪牛 女宿旗青質赤火焰脚畫神

人烏牛首衣朱服皂襴黃帶烏鞞左手持蓮外仗繪四

星下繪龜 虛宿旗青質赤火焰脚畫神人被髮裸形

坐于甕中右手持一珠外仗繪二星下繪鼠 危宿旗

青質赤火焰脚畫神人虎首金甲衣朱服貔皮汗胯青
帶烏鞞外仗上繪三星下繪燕 室宿旗青質赤火焰
脚畫神人丫髮朱服乘舟水中外仗繪二星下繪猪
壁宿旗青質赤火焰脚繪神人為女子形被髮朱服皂
欄綠帶白裳烏烏外仗繪二星下繪猢 奎宿旗青質
赤火焰脚畫神人狼首朱服金甲綠包肚白汗胯黃帶
烏鞞仗劍外仗奎婁以下七旗並素質素火焰脚奎宿
繪十六星下繪狼 婁宿旗青質赤火焰脚繪神人烏

巾素衣皂袍朱蔽膝黃帶綠裳烏烏左手持烏牛角右手仗劍外仗繪三星下繪狗 胃宿旗青質赤火焰脚繪神人被髮裸形披豹皮白腰裙黃帶右手持劍外仗繪三星下繪雉 昂宿旗青質赤火焰脚繪神人黃牛首朱服皂襪黃裳朱烏左手持如意外仗繪七星下繪雞 畢宿旗青質赤火焰脚繪神人作鬼形朱視持黑杖乘赤馬行于火中外仗上繪八星下繪烏 觜宿旗青質赤火焰脚繪神人冠縹布冠朱服皂襪綠裳持一

蓮生于雲氣中外仗繪三星下繪猴 參宿旗青質赤

火焰脚繪神人被髮衣黃袍綠裳朱帶朱烏左手持珠

外仗上繪十星下繪猿 井宿旗青質赤火焰脚繪神

人烏巾素衣朱袍皂襪坐于雲氣中左手持蓮外仗井

鬼以下七旗並赤質赤火焰脚井宿繪八星下繪犴

鬼宿旗青質赤火焰脚繪神人作女子形被髮素衣朱

袍黃帶黃裳烏烏右手持杖外仗繪五星下繪羊 柳

宿旗青質赤火焰脚繪神人作女子形露髻朱衣黑襪

黃裳皂烏撫一青龍外仗繪八星下繪麈 星宿旗青

質赤火焰脚繪神人冠五梁冠淺朱袍皂襪青帶黃裳
烏烏持黃稱外仗繪七星下繪馬 張宿旗青質赤火

焰脚繪神人衣豹皮朱帶素鞞右手仗劍坐于雲氣中
外仗繪六星下繪鹿 翼宿旗青質赤火焰脚繪神人

冠道冠皂袍黃裳朱蔽膝仗劍履火于雲氣中外仗繪
二十二星下繪蛇 軫宿旗青質赤火焰脚繪神人冠

道冠衣朱袍黃帶黃裳左手持書外仗繪四星下繪蚓

日旗赤質赤火焰脚繪日于上奉以雲氣 月旗青

質赤火焰脚繪月于上奉以雲氣 祥雲旗青質赤火

焰脚繪五色雲氣 合璧旗青質赤火焰脚繪雲氣日

月 連珠旗青質赤火焰脚繪五星 東嶽旗青質赤

火焰脚繪神人冠七梁冠黃欄青袍綠裳白中單素蔽

膝執圭 南嶽旗赤質青火焰脚繪神人冠七梁冠黑

欄緋袍綠裳黃中單朱蔽膝執圭 中嶽旗黃質赤火

焰脚繪神人冠七梁冠皂欄黃袍綠裳白中單朱蔽膝

執圭 西嶽旗白質赤火焰脚繪神人冠七梁冠青襪

白袍緋裳白中單素蔽膝執圭 北嶽旗黑質赤火焰

脚繪神人冠七梁冠紅襪皂袍綠裳白中單素蔽膝執

圭 江瀆旗赤質青火焰脚繪神人冠七梁冠青襪朱

袍跨赤龍 河瀆旗黑質赤火焰脚繪神人冠七梁冠

皂襪黃袍跨青龍 淮瀆旗素質赤火焰脚繪神人冠

七梁冠皂襪素袍乘青鯉 濟瀆旗青質赤火焰脚繪

神人冠七梁冠皂襪青袍乘一鰲 天下太平旗赤質

青火焰脚錯采為字 皇帝萬歲旗赤質青火焰脚錯

采為字 吏兵旗黑質赤火焰脚繪神人具甲兜鍪綠

臂鞬仗劍 力士旗白質赤火焰脚繪神人武士冠緋

袍金甲汗胯皂履執戈盾 東天王旗青質赤火焰脚

繪神人武士冠衣金甲緋柄襜右手執戟左手奉塔履

石 南天王旗赤質青火焰脚繪神人冠服同前 西

天王旗白質赤火焰脚繪神人冠服同前 北天王旗

黑質赤火焰脚繪神人冠服同前 大神旗黃質黃火

焰脚詳見牙門旗下 牙門旗赤質赤火焰脚繪神人

冠武士冠鎧甲柄襠襯肩包肚汗胯束帶長帶大口袴

執戈戟 金鼓旗黃質黃火焰脚書金鼓字 朱雀旗

赤質赤火焰脚繪朱雀其形如鸞 玄武旗黑質黑火

焰脚繪龜蛇 青龍旗青質赤火焰脚繪蹲龍 白虎

旗白質赤火焰脚繪蹲虎 龍君旗青質赤火焰脚繪

神人冠通真冠服青繡衣白裙朱履執戟引青龍 虎

君旗白質赤火焰脚繪神人冠流精冠服素羅繡衣朱

裙朱履執斬蛇劍引白虎 大黃龍負圖旗青質青火

焰脚繡複身黃龍背八卦 小黃龍負圖旗赤質青火

焰脚繪複身黃龍背八卦 五色龍旗五色質五色直

脚無火焰 大四色龍旗青赤黃白四色質俱火焰脚

小四色龍旗制同大四色直脚無火焰 應龍旗赤

質赤火焰脚繪飛龍 金鸞旗赤質青火焰脚繪鸞而

金色 鸞旗制同前而繪以五采 金鳳旗赤質青火

焰脚繪鳳而金色 鳳旗制同前而繪以五采 五色

鳳旗五色質五色直脚無火焰 大四色鳳旗青赤黃
白四色質火焰脚色隨其質繪鳳 小四色鳳旗制同
前直脚無火焰 玉馬旗赤質青火焰脚繪白馬兩膊
有火焰 駃騠旗赤質青火焰脚繪白馬 飛黃旗赤
質赤火焰脚形如馬色黃有兩翼 驪騮旗青質青火
焰脚繪獸形如馬白首虎文赤尾 龍馬旗赤質青火
焰脚繪龍馬 麟旗赤質青火焰脚繪麒麟 飛麟旗
赤質青火焰脚繪飛麟其形五色身朱翼兩角長爪

黃鹿旗赤質青火焰脚繪獸如鹿而色深黃 兕旗赤

質青火焰脚繪獸似牛一角青色 犀牛旗赤質青火

焰脚繪犀牛 金牛旗赤質青火焰脚繪獸形如牛金

色 白狼旗赤質青火焰脚繪白狼 辟邪旗赤質赤

火焰脚繪獸形似鹿長尾二角 赤熊旗赤質赤火焰

脚繪獸如熊色黃 三角獸旗赤質赤火焰脚繪獸其

首類白澤綠髮三角青質白腹跋尾綠色 角端旗赤

質赤火焰脚繪獸如羊而小尾頂有獨角 駟牙旗赤

質青火焰脚繪獸形似麋齒前後一齊 太平旗赤質

青火焰脚繪描蓮花四上金書天下太平字 鷄鷄旗

赤質青火焰脚繪鳥似山雞而小冠背黃腹赤項綠尾

紅 蒼烏旗赤質青火焰脚繪鳥如烏而色蒼 白澤

旗赤質赤火焰脚繪獸虎首朱髮而有角龍身 東方

神旗綠質赤火焰脚繪神人金兜牟鎧甲仗劍 已下四旗所繪

神同 西方神旗赤質青火焰脚 中央神旗黃質赤火

焰脚 南方神旗赤質青火焰脚 北方神旗黑質赤

火焰脚 凡立仗諸旗各火焰脚三條色與質同長一

丈五尺杠長二丈一尺牙門太平萬歲質長一丈橫闊

五尺日月龍君虎君橫豎並八尺餘旗並豎長八尺橫

闊六尺 車輻朱漆八稜施以銅釘形如柯舒 吾杖

朱漆金飾兩末 鐙杖朱漆棒首標以金塗馬鐙 及

制如稍而短黑飾兩末中畫雲氣上綴朱絲拂 骨朶

朱漆棒首貫以金塗銅鎚 列絲骨朶制如骨朶加紐

絲丈 臥瓜制形如瓜塗以黃金臥置朱漆棒首 立

瓜制形如瓜塗以黃金立置朱漆棒首長刀長丈有

奇闊上窄下單刃儀刀制以銀飾紫絲帔鍔橫刀

制如儀刀而曲鞘以沙魚皮飾倭革帔鍔千牛刀制

如長刀劔斑鞘飾以沙魚皮劔口兩刃斑劔制劔

鞘黃質紫斑文金銅裝紫絲帔鍔刀盾之刀制如長

刀而柄短木為之青質有環紫絲帔鍔刀盾之盾制

以木赤質畫異獸執人右刀左盾朱滕絡盾制同而

朱其質綠滕絡盾制同而綠其質戟制以木有枝

塗以黃金竿以朱漆 小戟飛龍掌制如戟畫雲氣上

綴飛掌垂五色帶末有銅鈴掌下方而上兩角微擗繪

龍於其上 鈇戟制如戟無飛掌而有橫木 稍制以

木黑質畫雲氣上刻刃塗以青五色稍並同而質異

纒制如戟鋒兩旁微起下有鐔銳 义制如戟而短青

飾兩末中白畫雲氣上綴紅絲拂 斧雙刃斧貫于朱

漆竿首 鉞金塗鐵鉞單刃腦後繫朱拂朱漆竿 劈

正斧制以玉單刀金塗柄銀鐔 儀鎧斧制如斧刻木

為之柄以朱上綴小錦旛五色帶 弓矢 弩制如弓

而有臂 眼制以虎豹皮或暴綠文金銅裝 鞞制以

黑革 蘭弩矢室 象鞞鞍五采裝明金木蓮花座緋

繡攀鞍條紫繡襜褕紅錦屐鍤石蓮花跋塵錦緣檀盤

紅犛牛尾纓拂并胸攀鞞攀上各帶紅犛牛尾纓拂鍤

石胡桃鍤子杏葉鉸具緋皮纒頭鉸具蓮花座上金塗

銀香爐一元初既定占城交趾真臘歲貢象育于析津

坊海子之陽行幸則蕃官騎引以導大駕以駕巨輦

駝鼓設金裝鉸具花鬪鞍褥橐篋前峰樹皂纛或施采
旗後峰樹小旗絡腦當胸後鞦並以毛組為轡勒五色
瓊玉毛結纓絡周綴銅鐸小鏡上施一面有底銅擗小
鼓一人乘之繫以毛繩凡行幸先鳴鼓于駝以威振遠
邇亦以試橋梁伏水而次象焉 騾鼓制似駝而小
馬鼓轡勒後勒當胸皆綴紅纓拂銅鈴杏葉鉸具金塗
鈿上插雉毛上負四足小架上施以華鼓一面一人前
引凡行幸負鼓于馬以先馳與纛並行 誕馬纓轡緋

涼鐵 御馬鞍轡纓複全 珂馬銅面堆尾鼻拂胸上
綴銅杏葉紅絲拂又胸前腹下皆有攀綴銅鈴後有跋
塵錦包尾

崇天鹵簿

中道 頓遞隊象六飾以金裝蓮座香鑪寶鞍韉鞞轡
屬勒犛牛尾拂跋塵鉸具導者六人馭者南越軍六人
皆弓花角唐帽緋純銷金袷衫鍍金束帶烏鞞橫列前
行次駝鼓九飾以鍍金鉸具轡飾屬籠旗鼓纓槍馭者

九人服同馭象者中道相次而行次舍人二人四品服
騎分左右夾駝而行次青衣四人武弁青純衫青勒帛
青鞞執青杖次清道官四人本品服騎次信幡二執者
二人引護者四人武弁黃純生色寶相花袍黃勒帛黃
鞞次騾鼓六飾騾以鍍金鉸具轡屬籠旗鼓纓槍馭者
六人服同馭馳者次告止幡二執者二人引護者四人
武弁緋純生色寶相花袍紅勒帛紅鞞次傳教幡二執
者二人引護者四人武弁黃純生色寶相花袍黃勒帛

黃鞞並分左右次橋道頓遞使一人本品服騎中道舍
人清道官橋道頓遞使從者凡七人錦帽紫襖衫小銀
束帶行膝鞋襪

後凡從者之
服皆同此

纛稍隊金吾將軍二人

交角幞頭緋羅繡抹額紫羅繡辟邪衲襠紅錦襯袍錦
塍蛇金帶烏鞞橫刀佩符騎分左右次弩而騎者五人
錦帽青絕生色寶相花袍銅帶絲雲鞞次稍而騎者五
人錦帽緋絕生色寶相花袍銅帶朱雲鞞次纛一執者
一人夾者四人護者二人皆錦帽紫生色寶相花袍鍍

金帶紫雲鞞押纛官二人皆騎本品服次馬鼓四飾如
騾鼓馭者四人服同御騾次佩弓矢而騎者五人服同
執弩者押衙四人騎而佩劍錦帽紫絕生色寶相花袍
鍍金帶雲頭鞞襍稍者四人騎錦帽緋絕生色寶相花
袍銅帶朱鞞控馬八人錦帽紫衫銀帶烏鞞次稍而騎
者五人服佩同執弩者金吾將軍押纛官從者四人服
同前隊 朱雀隊舍人一人四品服騎而前次朱雀旗
一執者一人引護者四人錦帽緋絕生色鳳花袍銅帶

朱雲鞞皆佩劍而騎護者加弓矢次金吾折衝一人交
角幟頭緋純繡抹額紫羅繡辟邪衲襠紅錦襯袍金帶
錦螭蛇烏鞞橫刀佩弓矢而騎帥甲騎凡二十有五弩
五人次弓五人次稍五人次弓五人次稍五人皆冠甲
騎冠朱畫甲青勒甲條鍍金環白繡汗胯束帶紅鞞帶
弓箭器仗馬皆朱甲具裝珂飾全舍人金吾折衝從者
凡二人服同前隊 十二旗隊舍人一人四品服騎而
前金吾果毅二人交角幟頭緋羅繡抹額紫羅繡辟邪

柄襠紅錦襯袍金帶錦螭蛇烏鞞橫刀佩弓矢騎分左
右帥引旗騎士五皆錦帽黃生色寶相花袍銀帶烏鞞
次風伯旗左雨師旗右雷公旗左電母旗右執者四人
騎青甲騎冠綠甲青勒甲條鍍金環白繡汗胯束帶青
雲鞞馬皆青甲珂飾次五星旗五執者五人甲騎冠五
色畫甲青勒甲條鍍金環白繡汗胯束帶五色鞞馬甲
如其甲之色珂飾次北斗旗一執者一人甲騎冠紫畫
甲青勒甲條鍍金環白繡汗胯束帶紫雲鞞冠甲隨其

甲之色珂飾左右攝提旗二執者二人甲騎冠朱畫甲
青勒甲條鍍金環白繡汗胯束帶紅雲鞞馬朱甲珂飾
執副竿者二人騎錦帽黃生色寶相花袍銀帶烏鞞執
稍而護者五人騎服同執副竿者舍人金吾果毅從者
凡三人服同前隊 門旗隊舍人二人四品服監門將
軍二人皆交角幘頭緋絕繡抹額紫羅繡獅子衲襠紅
錦襯袍金帶烏鞞橫刀佩弓矢騎馬甲珂飾全次門旗
二執者二人錦帽緋絕生色獅子文袍銅革帶紅雲鞞

劔而騎引護者四人服佩同執人而加弓矢騎次監門
校尉二人騎服佩同監門將軍分左右行次鸞旗一執
者一人引護者四人錦帽五色純生色瑞鸞花袍束帶
五色雲鞞佩劔護人加弓矢皆騎舍人監門將軍監門
校尉從者凡六人服同前隊 雲和樂雲和署令二人
朝服騎分左右引前行凡十有六人戲竹二排簫四簫
管二龍笛二板二歌工四皆展角花幘頭紫純生色雲
花袍鍍金帶紫鞞次琵琶二十箏十有六瑩篴十有六

纂十有六方響八頭管二十有八龍笛二十有八已上
工百三十有二人皆花幘頭緋絕生色雲花袍鍍金帶
朱鞞次杖鼓三十工人花幘頭黃生色花襖紅生色花
袍錦臂鞞鍍金帶烏鞞次板八工人服色同琵琶工人
次大鼓二工十人服色同杖鼓工人雲和署令從者二
人服同前隊 殿中黃麾隊舍人二人四品服殿中侍
御史二人本品服皆騎次黃麾一執者一人夾者二人
騎武弁緋絕生色寶相花袍紅勒帛紅雲鞞舍人殿中

侍御史從者凡四人服同前隊 太史鉦鼓隊太史一

人本品服騎引交龍調鼓左金鉦右舁四人工二人皆

武弁緋純生色寶相花袍紅勒帛紅鞞次司辰郎一人

左典事一人右並四品服騎太史司辰郎典事從者三

人服同前隊 武衛釵戟隊武衛將軍一人交角幘頭

緋羅繡抹額紫羅繡瑞鷹襖襠紅錦襯袍錦螭蛇金帶

橫刀騎領五色繡幡一金節八罕右翼左朱雀青龍白

虎幢三橫布導蓋一中道叉四武衛果毅二人服佩同

武衛將軍釵二十戟二十徒五十有九人武弁緋絕生
色寶相花袍紅勒帛紅鞞武衛將軍武衛果毅從者凡
三人服同前隊 龍墀旗隊舍人二人四品服中郎將
二人服佩同釵戟隊武衛將軍騎分左右帥騎士凡二
十有四人執旗者八人天下太平旗中道中嶽帝旗左
中央神旗右次日旗左月旗右次祥雲旗二分左右次
皇帝萬歲旗中道執人皆黃純巾黃純生色寶相花袍
黃勒帛黃雲鞞橫刀引者八人青純巾青純生色寶相

花袍青勒帛青雲鞞橫刀執弓矢護者八人緋絕巾緋
絕生色寶相花袍紅勒帛紅雲鞞橫刀執弓矢舍人中
郎將從者凡四人服同前隊 御馬隊舍人二人四品
服引左右衛將軍二人緋羅繡抹額紫羅繡瑞馬襴襠
紅錦襯袍錦螭蛇金帶烏鞞橫刀皆騎分左右行御馬
十有二匹分左右飾以纓鞍轡複馭士控鶴二十有四
人交角金花幘頭紅錦控鶴襖銅束帶翰鞋次尚承奉
御二人四品服騎分左右行舍人左右衛將軍從者四

人服同前隊 拱衛控鶴第一隊拱衛指揮使二人本品服騎分左右帥步士凡二百五十有二人負劍者三十人次執吾杖者五十人次執斧者五十人次執鐙杖者六十人次執列絲骨朶者三十人皆分左右次攜金水瓶者一人左金盃者一人右次執列絲骨朶者三十人皆分左右皆金縷額交角幘頭青濟遜控鶴襖塗金荔枝束帶鞵鞋拱衛指揮使從者二人服同前隊 安和樂安和署令二人本品服騎分左右行領押職二人

弓角鳳翅金花幙頭紅濟遜加襴袍金束帶花鞞次扎
鼓八為二重次和鼓一中道次板二次龍笛四次頭管
二次羌笛二次笙二次簫二左右行次雲璈一中道工
二十有四人皆弓角鳳翅金花幙頭紅錦濟遜襖金荔
枝束帶花鞞從者二人服同前隊 金吾援寶隊舍人
二人四品服引金吾將軍二人交角幙頭緋羅繡抹額
紫羅繡辟邪柄襜紅錦襯袍錦膝蛇橫刀佩弓矢皆騎
分左右前引駕十二重甲士一十二騎弩四次弓四次

稍四為三重次香案二金爐合各二分左右昇士十有
六人侍香二人騎而從次典瑞使二人本品服騎而左
右引八寶受命寶左傳國寶右次天子之寶左皇帝之
寶右次天子行寶左皇帝行寶右次天子信寶左皇帝
信寶右每輿寶蓋銷金蒙複襯複案輿紅銷金衣龍頭
竿結綬昇士八人朱團扇四人凡九十有六人皆交角
金花幘頭青紅錦濟遜襖每輿前青後紅金束帶鞞鞋
授寶三十人交角金花幘頭窄紫衫銷金紅汗胯金束

帶烏鞋執金縷黑杖次符寶郎二人四品服騎分左右
次金吾果毅二人服佩同金吾將軍騎分左右次稍四
人次弓四人次弩四人為三重舍人金吾將軍侍香典
瑞使符寶郎金吾果毅從者凡十有二人服同前隊
殿中繖扇隊舍人二人四品服騎分左右領騎而執旗
者四人日月合璧旗左五星連珠旗右次金龍旗左金
鳳旗右黃純巾黃純生色寶相花袍黃勒帛黃鞞佩劍
騎而引旗者四人青純巾青純生色寶相花袍青勒帛

青鞞佩劍執弓矢騎而護旗者四人紅絁巾紅絁生色

寶相花袍紅勒帛紅鞞佩劍執弓矢次朱團扇十有六

次小雉扇八次中雉扇八次大雉扇八為十重重四人

次曲蓋二紅方纈二次紫方纈二次華蓋二次大纈二

執者五十人武弁紅絁生色寶相花袍紅勒帛紅鞞舍

人從者二人服同前隊控鶴圍子隊圍子頭一人執

骨朶由中道交角幙頭緋錦濟遜襖鍍金荔枝帶鞞鞋

頰執圍子十有六人分左右交角金花幙頭白襯肩青

錦濟遜襖鍍金荔枝帶鞵鞋次朱繖中道次金脚踏左

金椅右服如圍子頭拱衛指揮使一人本品服騎中道

控鶴二十人服同上拱衛指揮使從者二人服同前隊

天樂一部天樂署令二人本品服騎分左右領押職

二人弓角鳳翅金花幘頭紅錦濟遜襖加襪金束帶花

鞵次琵琶二篳篥二和必斯二板二箏二胡琴二笙二

頭管二龍笛一響鐵一工十有八人徒二人皆弓角鳳

翅金花幘頭紅錦濟遜襖鍍金束帶花鞵 控鶴第二

隊僉拱衛司事二人本品服騎分左右帥步士凡七十
有四人執立瓜者三十有六人分左右次捧金杙一人
左鞭桶一人右次蒙鞍一人左散手一人右次執立瓜
者三十有四人分左右皆交角金花幞頭緋錦濟遜襖
鍍金荔枝帶鞞鞋僉拱衛司事從者二人服同前隊
殿中導從隊舍人二人四品服騎左右引香鐙案一黃
銷金盤龍衣金爐合結綬龍頭竿鼻者十有二人交角
金花幞頭紅錦濟遜控鶴襖鍍金束帶鞞鞋侍香二人

騎分左右次警蹕三人交角幙頭紫窄袖衫鍍金束帶

烏鞞次舍人二人四品服騎引天武官二人執金鉞金

鳳翅兜牟金鎖甲青勒甲條金環繡汗胯金束帶馬珂

飾次金骨朶二次幢二次節二分左右次金水盆左金

椅右次蒙複左副執椅右次金水瓶鹿盧左銷金淨巾

右次金香毬二金香合二分左右次金唾壺左金唾盂

右金拂四扇十分左右次黃繖中道繖衣從凡騎士三

十人服如警蹕如白繡汗胯步卒四人

執椅二人
繖衣一人

服如舁香燈徒舍人天武官從者六人服同前隊 控
鶴第三隊供衛直鈐轄二人本品服騎引執臥瓜八十
人服如第二隊 導駕官引進使二人分左右前行次
給事中一人左起居注一人右侍御史一人左殿中侍
御史一人右次翰林學士一人左集賢學士一人右次
御史中丞一人左同知樞密院事一人右次御史大夫
一人左知樞密院事一人右次侍儀使四人中書侍郎
二人黃門侍郎二人侍中二人皆分左右次儀仗使一

人左鹵簿使一人右次禮儀使二人分左右持劈正斧
一人中道次大禮使一人左太尉一人右皆本品服騎
從者三十人惟執劈正斧官從者二人服同前隊羽
林宿衛舍人二人四品服前行次羽林將軍二人交角
幘頭緋羅繡抹額紫羅繡瑞鷹柄襠紅錦襯袍錦螭蛇
金帶烏鞞橫刀佩弓矢皆騎分左右領宿衛騎士二十
人執骨朶六人次執短戟六人次執斧八人皆弓角金
鳳翅幘頭紫袖細褶辮線襖束帶烏鞞橫刀舍人羽林

將軍從者凡四人服同前隊

檢校官

分佈中道之內頓

遞隊監察御史二人本品服次纛稍隊巡仗檢校官二
人次朱雀隊金吾中郎將二人皆交角幞頭緋羅繡抹
額紫羅繡辟邪襖襠紅錦襯袍錦螭蛇金帶烏鞞佩儀
刀加弓矢次十二旗隊兵部侍郎二人本品服次門旗
隊糾察儀仗官二人本品服次雲和樂部金吾將軍二
人服佩如金吾中郎將知隊仗官二人本品服次武衛
鉞戟隊監察御史二人本品服次外道左右牙門巡仗

監門中郎將二人交角幞頭緋羅繡抹額紫羅繡獅子
襖襠紅錦襯袍錦螭蛇金帶烏鞞佩儀刀弓矢次金吾
授寶隊兵部尚書二人次巡仗檢校官二人次殿中繖
扇隊監察御史二人次禮部尚書二人皆本品服次圍
子隊知隊仗官二人次金吾大將軍二人服同金吾將
軍各撮稍從次殿中道從隊糾察儀仗官二人次巡仗
檢校官二人次羽林宿衛隊左點檢一人左右點檢一
人右紫羅繡瑞麟襖襠餘同金吾大將軍領大黃龍負

圖旗二執者二人夾者八人騎錦帽五色絕巾五色絕
生色雲龍袍塗金束帶五色雲鞞佩劍夾者加弓矢並
行中道控鶴外外仗內前後檢校仗內知班六人展角
幘頭紫窄衫塗金束帶烏鞞承班都知一人太常博
士一人皆朝服騎門檢校官前後巡察宿直將軍八人
服佩同左右點檢夾輅檢校三衛陪輅隊誕馬二匹
珂飾纓轡青屐乘黃令二人本品服分左右次殿前將
軍二人交角幘頭緋羅繡抹額紫羅繡辟邪柄襠紅錦

襯袍錦螭蛇金帶烏鞞橫刀騎玉輅太僕卿馭本品服
千牛大將軍駮乘交角幟頭紅抹額繡瑞牛柄襠紅錦
襯袍錦螭蛇金帶烏鞞橫刀左右衛將軍服如千牛大
將軍惟柄襠繡瑞虎文陪輅輅馬六匹珂飾纓轡青屨
牽套鞞帶步卒凡八十有二人馭士四人駕士六十有
四人行馬二人踏道八人推竿二人托叉一人梯一人
皆平巾青幘青繡雲龍花袍塗金束帶青鞞教馬官二
人進輅職長二人皆本品服夾輅將軍二人金鳳翅兜

牟金鎖甲條環繡汗胯金束帶錄雲花鞞青漜水扇二
次千牛備身二人皆分左右交角幘頭緋羅繡抹額紫
羅繡瑞牛柄襠紅錦襯袍金帶烏鞞橫刀佩弓矢獻官
二人殿中監六人內侍十人皆本品朝服騎分左右千
牛備身後騎而執弓矢者十人尚衣奉御四人尚食奉
御二人尚輦奉御二人皆騎本品服次腰輿黃紵絲銷
金雲龍蒙複步卒凡十有三人昇八人導扇四人黃繖
一人皆交角金花幘頭紅濟遜控鶴襖金束帶鞞鞋尚

舍奉御二人騎左尚輦奉御二人騎右皆朝服從者三十有四人服同前隊 大神牙門旗隊都點檢一人騎交角幟頭緋羅繡抹額紫羅繡瑞麟柄襠紅錦襯袍次監門大將軍二人分左右騎服如都點檢惟柄襠紫繡獅文門凡三重親衛郎將帥甲士分左右夾輅而陣繞出輅後合執斃者二為第一門翊衛郎將帥護尉夾親衛而陣繞出輅後合為第二門監門校尉二人騎左右衛大將軍帥甲士執五色龍鳳旗夾護尉而陣繞出輅

後合牙門旗二為第三門監門校尉二人主之服色詳見外仗 雲和樂後部雲和署丞二人本品服騎分左右頷前行戲竹二排簫二簫管二歌工二凡十人皆騎花幘頭紫絕生色花袍塗金帶烏鞞次琵琶四箏四篳篥四簫四頭管六方響二龍笛六杖鼓十四十人皆騎服同上惟絕色紅從者二人服同前隊 後黃麾隊立武幢一絳麾二徒三人皆武弁紫絕生色龜雲花袍紫羅勒帛紫鞞次黃麾執者一人夾者二人皆騎豹尾一

執者一人夾者二人皆騎武弁索生色寶相花袍紫勒

帛紫鞞 玄武黑甲掩後隊金吾將軍一人騎中道交

角幘頭緋羅繡抹額紫羅繡辟邪衲襠紅錦襯袍金帶

錦螭蛇烏鞞佩刀後衛指揮使二人騎分左右服同各

衛指揮使帥甲騎五十有七人玄武旗一執者一人夾

者二人小金龍鳳黑旗二執者二人皆黑兜牟金飾黑

甲條環汗胯束帶鞞帶弓矢器仗馬黑金色獅子甲珂

飾豹四十人弩十人黑兜牟黑甲條環汗胯束帶鞞帶

弓矢器仗馬黑甲珂飾執衛司掾稍二人錦帽紫生色
辟邪文袍鍍金帶烏鞞從者三人服同前隊

外仗

金鼓隊金鼓旗二執者二人引護者八人皆五色絕巾
生色寶相花五色袍五色勒帛鞞佩劔引護者加弓矢
分左右次折衝都尉二人交角幘頭緋羅繡抹額紫羅
繡辟邪襖襠紅錦襯袍金帶錦螭蛇騎帥步士凡百二
十人鼓二十四人鈺二十四人並黃絕巾黃絕生色寶

相花袍黃勒帛黃鞞角二十四人紅絕巾紅絕生色寶

相花袍紅勒帛紅鞞車幅棒二十四人長刀二十四人

並金飾青兜牟青甲條環白繡汗胯束帶青雲鞞清

游隊舍人二人四品服騎導金吾折衝二人交角幞頭

緋羅繡抹額紫羅繡辟邪衲襠紅錦襯袍金帶錦螭蛇

橫刀佩弓矢騎分左右帥步士凡百有十人白澤旗二

執者二人引護者八人次執弩二十人次執稍二十人

次執弓二十人次執稍二十人次執弓二十人皆甲騎

冠金飾綠畫甲條環白繡汗胯束帶綠雲鞞佩弓矢器

仗馬金飾末畫甲珂飾分左右 欽飛隊鐵甲欽飛執

稍十有二人甲騎冠明鐵甲佩弓矢器仗馬鐵甲珂飾

次金吾果毅二人交角幞頭緋絕繡抹額紫羅繡辟邪

襖襠紅錦襯袍金帶錦螭蛇橫刀弓矢騎次虞候欽飛

執弩二十人錦帽紅生色寶相花袍塗金帶烏鞞 及

仗前隊領軍將軍二人交角幞頭緋絕繡抹額紫羅繡

白澤襖襠紅錦襯袍金帶錦螭蛇烏鞞橫刀騎帥步士

十執爨二十五人執爨二十五人錯分以左右皆五色

純生色巾寶相花五花袍五色勒帛五色雲頭鞞領軍

將軍從者二人錦帽紫袷衫小銀束帶行滕鞋襪 諸

衛馬前隊舍人二人四品服騎導左右衛郎將二人交

角幘頭緋純繡抹額紫繡瑞馬柄襠紅錦襯袍金帶錦

滕蛇烏鞞橫刀佩弓矢騎分左右帥騎士百五十六人

前辟邪旗左應龍旗右次玉馬旗左三角獸旗右次黃

龍負圖旗左黃鹿旗右次飛麟旗左馱馱旗右次鸞旗

左鳳旗右次飛黃旗左麒麟旗右執旗十有二人生色

黃袍巾勒帛鞞引旗十有二人服同執人惟袍色青護

旗十有二人生色紅袍巾勒帛鞞執弓六十人錦帽青

生色寶相花袍塗金帶烏鞞執稍六十人服如執弓者

惟袍色紅每旗弓五稍五從者四人服同前隊 二十

八宿前隊舍人二人四品服騎導領軍將軍二人紫羅

繡白澤襖襠餘如前隊左右衛郎將皆騎帥步士百十

有二人前井宿旗左參宿旗右各五盾從次鬼宿旗左

觜宿旗右各五弓從次柳宿旗左畢宿旗右各五纒從
次星宿旗左昴宿旗右各五盾從次張宿旗左胃宿旗
右各五弓從次翼宿旗左婁宿旗右各五纒從次軫宿
旗左奎宿旗右各五盾從執旗十有四人生色黃袍巾
勒帛鞞引旗十有四人服如執人惟袍巾色青護旗十
有四人服如執人惟袍巾色紅執刀盾者三十人弓矢
者二十人纒者二十人皆五色兜牟甲條環白繡汗膝
束帶五色雲鞞舍人領軍將軍從者四人服同前隊

左右領軍黃麾仗前隊舍人二人四品服騎導領軍將
軍二人服佩如二十八宿旗隊領軍將軍騎分左右帥
步士百五十人絳引旛十次龍頭竿繡氅十皆分左右
次江瀆旗左濟瀆旗右次小戟十次弓十皆分左右次
南方神旗左西方神旗右次鎧十次綠滕絡盾加刀十
皆分左右次南岳帝旗左西岳帝旗右次龍頭竿氅十
次朱滕絡盾加刀十皆分左右次南天王旗左西天王
旗右次小戟十次弓十皆分左右次龍君旗左虎君旗

右次鎧十次綠滕絡盾加刀十皆分左右執人一百三

十人武弁五色生色寶相花袍勒帛鞞引旗十人青生

色寶相花袍巾勒帛鞞護旗十人服同惟袍巾色紅

受仗後隊領軍將軍二人騎帥步士凡五十人受二十

有五叉二十有五錯分左右服佩同前隊 左右牙門

旗隊監門將軍二人騎紫羅繡獅襖襠餘如受仗隊領

軍將軍之服佩次牙門旗四每旗執者一人引夾者二

人並黃純巾黃純生色寶相花袍黃勒帛黃雲鞞皆騎

次監門校尉二人騎服佩同監門將軍從者四人服同
前隊 左右青龍白虎隊舍人二人四品服騎導領軍
將軍二人服佩同受仗隊之領軍將軍騎分左右帥甲
士凡五十有六人騎青龍旗左執者一人夾者二人從
以執弩五人弓十人稍十人皆冠青甲騎冠青鐵甲青
條金環束帶白繡汗胯青雲鞞白虎旗右執者一人夾
者二人從以執弩五人弓十人稍十人皆冠白甲騎冠
白鐵甲青條金環束帶白繡汗胯白雲鞞舍人領軍將

軍從者四人服同前隊 二十八宿後隊舍人二人四

品服騎導領軍將軍二人騎分左右帥步士百十二人

角宿旗左壁宿旗右各從以執弓者五人次亢宿旗左

室宿旗右各從以執轡者五人次氐宿旗左危宿旗右

各從以執盾者五人次房宿旗左虛宿旗右各從以執

弓者五人次心宿旗左女宿旗右各從以執轡者五人

次尾宿旗左牛宿旗右各從以執盾者五人次箕宿旗

左斗宿旗右各從以執弓者五人舍人領軍將軍從者

四人執夾引從服佩皆同前隊 諸衛馬後隊舍人二
人四品服騎導左右衛果毅都尉二人騎分左右帥衛
士百五十有六人角端旗左赤熊旗右次兕旗左太平
旗右次驪騮旗左騶牙旗右次犀牛旗左駿驥旗右次
蒼烏旗左白狼旗右次龍馬旗左金牛旗右舍人左右
衛果毅都尉從者四人執夾引從服佩同前隊 左右
領軍黃麾後隊舍人二人四品服騎導領軍將軍二人
騎分左右帥步士百六十人龍頭氅十次朱滕絡盾加

刀十皆分左右次吏兵旗左力士旗右次小戟十次弓

十皆分左右次東天王旗左北天王旗右次鎧十次綠

滕絡盾加刀十皆分左右次東岳帝旗左北岳帝旗右

次龍頭竿氅十次朱滕絡盾加刀十皆分左右次東方

神旗左北方神旗右次小戟十次弓十皆分左右淮瀆

旗左河瀆旗右次鎧十次綠滕絡盾加刀十皆分左右

次絳引旂十分左右掩後舍人領軍將軍從者四人執

夾服佩並同前隊 左右衛儀刀班劔隊舍人二人四

品服騎導左右衛中郎將二人交角幘頭緋羅繡抹額
紫羅繡瑞馬襖襠紅錦襯袍錦滕蛇金帶烏鞞騎分左
右帥步士凡四十人班劔二十人儀刀二十人並錦帽
紅生色寶相花袍塗金束帶烏鞞舍人左右衛中郎將
從者四人服同前隊 供奉宿衛步士隊供奉中郎將
二人交角幘頭緋羅繡抹額紫羅繡瑞馬襖襠紅錦襯
袍錦滕蛇金帶烏鞞橫刀佩弓矢騎分左右帥步士凡
五十二人執短戟十有二人次執列絲十有二人次又

戟十有二人次斧十有六人分左右夾玉輅行皆弓角

金鳳翅幘頭紫細摺辮線襖塗金束帶烏鞞 親衛步

士隊親衛郎將二人服同供奉中郎將騎分左右帥步

士凡百四十有八人執龍頭竿斃四人次小戟十人次

斃二人次儀鎧十人次斃二人次小戟十人次斃二人

次儀鎧十人次斃二人次小戟十人次斃二人次儀鎧

十人次斃二人次儀鎧十人次斃二人次儀鎧十人次

斃二人次小戟十人皆分左右夾供奉宿衛隊次斃二

人次儀鎧十人次斃二人次小戟十人次斃二人次儀
鎧十人次斃二人折繞宿衛隊後而合其端為第一門
士皆金兜牟甲青勒甲條金環綠雲鞞 翊衛護尉隊
翊衛郎將二人服同親衛郎將騎帥護尉騎士百有二
人皆交角金花幘頭窄袖紫衫紅銷金汗胯塗金束帶
烏鞞執金裝骨朶分左右夾親衛隊行折繞隊後而合
其端為第二門 左右衛甲騎隊左右衛大將軍二人
服如翊衛郎將帥騎士百人執青龍旗五人左青鳳旗

五人右次赤龍旗五人左赤鳳旗五人右次黃龍旗五
人左黃鳳旗五人右次白龍旗五人左白鳳旗五人右
次黑龍旗五人左黑鳳旗五人右次五色鳳旗二十五
居左五色龍旗二十五居右曲繞輅後合牙門旗為第
三門士皆冠甲騎冠金飾朱畫甲青勒甲條鍍金環白
繡汗胯紅鞞佩弓矢器仗馬青金毛獅子甲珂節左
衛青甲隊左衛指揮使二人騎服紫羅繡雕虎襖襠餘
同左右衛大將軍帥騎士三十有八人執大青龍旗一

人左大青鳳旗一人右次小青龍旗一人左小青鳳旗
一人右次大青鳳旗一人左大青龍旗一人右每旗從
以持青稍者四人次小青鳳旗一人左小青龍旗一人
右皆從以持青稍者三人皆青兜牟金飾青畫甲青條
塗金環汗胯束帶鞞佩弓矢器仗馬青金毛獅子甲珂
飾折繞陪門 前衛赤甲隊前衛指揮使二人騎服佩
同左衛指揮使帥騎士凡四十有八人執大赤鳳旗一
人左大赤龍旗一人右次小赤鳳旗一人左小赤龍旗

一人右次大赤龍旗一人左大赤鳳旗一人右次小赤龍旗一人左小赤鳳旗一人右每旗從以持朱稍者四人次執大赤鳳旗一人左大赤龍旗一人右皆從以持朱稍者三人皆朱兜牟金飾朱畫甲條環汗胯束帶鞞佩弓矢器仗馬朱甲珂飾從者二人服同前隊折繞陪門中衛黃甲隊中衛指揮使二人騎服同前衛指揮使帥騎士凡五十有八人執大黃龍旗一人左大黃鳳旗一人右次小黃龍旗一人左小黃鳳旗一人右次大

黃鳳旗一人左大黃龍旗一人右次小黃鳳旗一人左
小黃龍旗一人右次大黃龍旗一人左大黃鳳旗一人
右每旗從以持黃稍者四人次小黃龍旗一人右小黃
鳳旗一人右皆從以持黃稍者三人皆黃兜牟金飾黃
甲條環汗胯束帶鞞佩弓矢器仗馬黃甲珂飾從者二
人服同前隊折繞陪門 右衛白甲隊右衛指揮使二
人騎服同中衛指揮使帥騎士凡七十有四人執大白
鳳旗一人左大白龍旗一人右次小白鳳旗一人左小

白龍旗一人右次大白龍旗一人左大白鳳旗一人右
次小白龍旗一人右小白鳳旗一人右次大白鳳旗一
人左大白龍旗一人右每旗從以持白稍者四人次小
白鳳旗一人左小白龍旗一人右次大白龍旗一人左
大白鳳旗一人右皆從以持白稍者五人皆白兜牟金
飾白甲條環汗胯束帶鞞佩弓矢器仗馬白甲珂飾從
者二人服同前隊折繞陪門牙門四監門中郎將二
人服佩同各衛指揮使騎分左右次左衛次前衛次中

衛次右衛牙門旗各二色並赤監門校尉各二人騎服
佩同各衛之執旗者從者十人服同前隊

元史卷七十九

元史卷七十九考證

車幅朱漆八稜形如柯舒 按宋儀仗內有柯舒黑漆
棒亦作哥舒

雲和樂杖鼓三十 續集禮載杖鼓三十四大鼓十六
又安和樂和鼓雲璫各二金鼓隊步士作百三十人
及鼓鉦等人服色並與志異

矢仗前隊左右領軍黃麾仗前隊 矢仗下脫前字領
軍上脫左右字據續集禮增又頓遞隊青衣四人訛

一人尊駕官翰林學士一人訛二人並據續集禮及
經世大典改

欽定四庫全書蒼要卷六千四百五十九

史部

元史卷八十

明翰林學士亞中大夫知制誥兼修國史宋濂等修

志第三十

輿服三

儀衛

殿上執事

挈壺郎二人掌直漏刻冠學士帽服紫羅窄袖衫塗金

東帶烏鞞漏刻直御榻南 司香二人掌侍香以主服

御者

國語曰舒庫爾齊

攝之冠服同挈壺香案二在漏刻東西

稍南司香侍案側東西相向立 酒人凡六十主酒

國語

曰達喇齊

二十人主漣

國語曰哈喇齊

二十人主膳

國語曰博羅齊

二十人

冠唐帽服同司香酒海直漏南酒人北面立酒海南

護尉四十人以質子在宿衛者攝之

質子國語曰圖魯格

冠交角

僕頭紫梅花羅窄袖衫塗金束帶白錦汗胯帶弓矢佩

刀執骨朶分立東西宇下 警蹕三人以控鶴衛士為

之冠交角幘頭服紫羅窄袖衫塗金束帶烏靴捧立于
露階每乘輿出入則鳴其鞭以警衆

殿下執事

司香二人亦以主服御者攝之冠服同殿上司香香案
直露階南司香東西相向立護尉凡四十人以戶郎

國語

曰諤
德齊

二十人質子二十人攝之服同宇下護尉夾立階

祀 右階下伍長凡六人都點檢一人右點檢一人左

點檢一人凡宿衛之人及諸門者戶者皆屬焉

如某審
台巴爾

噶齊譯德齊
之類是也

殿內將軍一人凡殿內佩弓矢者佩刀者

諸司禦者皆屬焉

如和爾齊伊勒
都齊之類是也

殿外將軍一人宇下

護尉屬焉宿直將軍一人黃麾立仗及殿下護尉屬焉

右無常官凡朝會則以近侍重臣攝之服白帽白袖襖

行膝履襪或服其品之公服恭事則侍立舍人授以骨

朶而易笏都點檢以玉右點檢以瑪瑙左點檢以水精

殿內將軍以瑪瑙殿外將軍以水精宿直將軍以金

左階之下伍長凡三人殿內將軍一人殿外將軍一人

宿直將軍一人冠服同右恭事則侍立舍人授以骨朶
而易笏殿內將軍以瑪瑙殿外將軍以水精宿直將軍
以金 司辰郎二人一人立左樓上服視六品候時北
面而雞唱一人立樓下服視八品候時捧牙牌趨丹墀
跪報露階之下左黃麾仗內設表案一禮物案一輿士
凡八人每案四人前二人冠縷金額交角幞頭緋錦寶
相花窄袖襖塗金束帶行滕鞋襪後二人冠服同前惟
襖色青 圍人十人

國語曰
阿都齊

冠唐巾紫羅窄袖衫青錦

緣白錦汗胯銅束帶烏靴馭立仗馬十覆以青錦緣緋
錦鞍複分左右立黃麾仗南 侍儀使二人引進使一
人通班舍人一人尚引舍人一人閱仗舍人一人奉引
舍人一人先輿舍人一人糾儀官凡四人尚書一人侍
郎一人監察御史二人知班三人視班內失儀者白糾
儀官而行罰焉皆東向立右仗之東以北為上 侍儀
使二人引進使一人承奉班都知一人宣表目舍人一
人宣表修撰一人宣禮物舍人一人奉表舍人一人奉

幣舍人一人尚引舍人一人闕仗舍人一人奉引舍人
一人先輿舍人一人押禮物官凡二人工部侍郎一人
禮部侍郎一人糾儀官凡四人尚書一人侍郎一人監
察御史二人知班三人視班內如左右輦路宣輦舍人
一人通贊舍人一人戶郎二人在承傳贊席前皆西向
立左仗西以北為上凡侍儀使引進使尚書侍郎御史
各服其本品之服承奉班都知舍人借四品服知班冠
展角幘頭服紫羅窄袖衫塗金束帶烏靴 護尉三十

人以質子在宿衛者攝之立大明門闌外冠服同宇下
護尉 承傳二人控鶴衛士為之立大明門楹間以承
傳于外仗冠服同警蹕執金柄小骨朶

殿下黃麾仗

黃麾仗凡四百四十有八人
分布于丹墀左右各五行

右前列執大蓋二人執華蓋二人執紫方蓋二人執紅
方蓋二人執曲蓋二人冠展角幘頭服緋純生色寶相
花袍勒帛烏靴 次二列執朱團扇八人執大雉扇八
人執中雉扇八人執小雉扇八人執朱團扇八人冠武

弁服同前執蓋者 次三列執黃麾幡十人武弁青純
生色寶相花袍青勒帛烏靴執絳引幡十人武弁緋純
生色寶相花袍緋勒帛烏靴執信幡十人冠服同上其
色黃執傳教幡十人冠服同上其色白執告止幡十人
冠服同上其色紫 次四列以下執葆蓋四十人武弁
服緋純生色寶相花袍勒帛烏靴執儀鎗斧四十人冠
服同上其色黃執小戟蛟龍掌四十人冠服同上其色
青左列亦如之皆以北為上押仗四人行視仗內而檢

校之冠服同警蹕者

殿下旗仗

旗仗執護引屏凡五百二十有八人分左右以列

左前列建天下太平旗第一牙門旗第二每旗執者一人
護者四人皆五色純巾五色純生色寶相花袍勒帛
雲頭靴執人佩劍護人加弓矢後屏五人執稍朱兜鍪
朱甲雲頭靴 左二列日旗第三龍君旗第四每旗執
者一人護者四人後屏五人巾服執佩同前列 右前
列建皇帝萬歲旗第一牙門旗第二每旗執者一人護

者四人後屏五人巾服執佩同左前列 右二列月旗
第三虎君旗第四每旗執者一人護者四人後屏五人
巾服執佩同前列 左次三列青龍旗第五執者一人
黃純巾黃純生色寶相花袍勒帛花靴佩劍護者二人
朱白二色純巾二色純生色寶相花袍勒帛花靴佩劍
加弓矢天王旗第六執者一人巾服同上護者二人青
白二色純巾二色生色寶相花袍勒帛花靴佩劍加弓
矢後屏五人執稍朱兜盔朱甲雲頭靴風伯旗第七執

者一人護者二人後屏五人巾服佩執同天王旗雨師
旗第八執者一人護者二人後屏五人巾服佩執同青
龍旗雷公旗第九執者一人巾服佩同上護者二人青
紫二色純巾二色純生色寶相花袍勒帛花巾佩劔加
弓矢後屏五人執稍白兜鍪白甲雲頭靴電母旗第十
執者一人護者二人後屏五人巾服執佩同風伯旗吏
兵旗第十一執者一人護者二人巾服佩同雷公旗後
屏五人執稍黃兜鍪黃甲雲頭靴 右次三列白虎旗

第五執者一人黃純巾黃純生色寶相花袍勒帛花靴
佩劍護者二人青朱二色純巾二色純生色寶相花袍
勒帛花靴佩劍加弓矢後屏五人執稍朱兜鍪朱甲雲
頭靴天王旗第六執者一人巾服同上護者二人青白
二色純巾二色純生色寶相花袍勒帛花靴佩劍加弓矢
後屏五人執稍朱兜鍪朱甲雲頭靴江瀆旗第七執者
一人護者二人後屏五人巾服執佩同天王旗河瀆旗
第八執者一人巾服佩同上護者二人青紫二色純巾

二色純生色寶相花袍勒帛花靴佩劍加弓矢後屏五

人執稍黃兜鍪黃甲雲頭靴淮瀆旗第九執者一人巾

服佩同上護者二人青朱二色純巾二色純生色寶相

花袍勒帛花靴佩劍加弓矢後屏五人巾服執佩同白

虎旗濟瀆旗第十執者一人巾服佩同上護者二人朱

白二色純巾二色純生色寶相花袍勒帛花靴佩劍加

弓矢後屏五人執稍青兜鍪青甲雲頭靴力士旗第十

一執者一人護者二人後屏五人巾服佩執同河瀆旗

二十二旗內拱衛直指揮使二人分左右立服本品朝服執玉斧次臥瓜一列次立瓜一列次列瓜一列冠縷金額交角幙頭緋錦寶相花窄袖襖塗金荔枝束帶行滕履襪次鐙仗一列次斧一列次吾仗一列次班劔一列並分左右立冠縷金額交角幙頭青錦寶相花窄袖襖塗金荔枝束帶行滕履襪 左次四列朱雀旗第十
二執者一人黃純巾黃純生色寶相花袍勒帛花靴佩劔護者二人青白二色純巾二色純生色寶相花袍勒

帛花靴佩劍加弓矢後屏五人執稍朱兜鍪朱甲雲頭
靴木星旗第十三執者一人巾服佩同上護者二人青
朱二色純巾二色純生色寶相花袍勒帛花靴佩劍加
弓矢後屏五人執稍青兜鍪青甲雲頭靴熒惑旗第十
四執者一人巾服佩同上護者二人青紫二色純巾二
色純生色寶相花袍勒帛花靴佩劍加弓矢後屏五人
巾服執佩同朱雀旗土星旗第十五執者一人護者二
人巾服佩同熒惑旗後屏五人執稍黃兜鍪黃甲雲頭

靴太白旗第十六執者一人護者二人巾服佩同木星
旗後屏五人執稍白兜鍪白甲雲頭靴水星旗第十七
執者一人護者二人巾服佩同太白旗後屏五人執稍
紫兜鍪紫甲雲頭靴鸞旗第十八執者一人巾服佩同
上護者二人朱白二色純巾二色純生色寶相花袍勒
帛花靴佩劔加弓矢後屏五人巾服佩同木星旗 右
次四列玄武旗第十二執者一人黃純巾黃純生色寶
相花袍勒帛花靴佩劔護者二人朱白二色純巾二色

純生色寶相花袍勒帛花靴佩劍加弓矢後屏五人紫
兜鍪紫甲雲頭靴執稍東嶽旗第十三執者一人護者
二人巾服佩同玄武旗後屏五人執稍青兜鍪青甲雲
頭靴南嶽旗第十四執者一人巾服佩同上護者二人
青白二色純巾二色純生色寶相花袍勒帛花靴佩劍
加弓矢後屏五人執稍朱兜鍪朱甲中嶽旗第十五執
者一人巾服佩同上護者二人紫青二色純巾二色純
生色寶相花袍勒帛花靴佩劍加弓矢後屏五人執稍

黃兜鍪黃甲雲頭靴西嶽旗第十六執者一人巾服佩
同上護者二人朱青二色純巾二色純生色寶相花袍
勒帛花靴佩劍加弓矢後屏五人執稍白兜鍪白甲北
嶽旗第十七執者一人護者二人巾服佩同南嶽旗後
屏五人巾服執同玄武旗麟旗第十八執者一人護者
二人後屏五人巾服執佩同西嶽旗左次五列角宿
旗第十九亢宿旗第二十氐宿旗第二十一房宿旗第
二十二心宿旗第二十三尾宿旗第二十四箕宿旗第

二十五每旗執者一人黃純巾黃純生色寶相花袍勒

帛花靴佩劔護者二人青朱二色純巾二色純生色寶

相花袍勒帛花靴佩劔加弓矢後屏五人青兜鍪青甲

執稍 右次五列奎宿旗第十九婁宿旗第二十胃宿

旗第二十一昴宿旗第二十二畢宿旗第二十三觜宿

旗第二十四參宿旗第二十五每旗執者一人黃純巾

黃純生色寶相花袍勒帛花靴佩劔護者二人青朱二

色純巾二色純生色寶相花袍勒帛花靴佩劔加弓矢

後屏五人執稍白兜鍪白甲 左次六列斗宿旗第二

十六牛宿旗第二十七女宿旗第二十八虛宿旗第二

十九危宿旗第三十室宿旗第三十一壁宿旗第三十

二每旗執者一人黃純巾黃純生色寶相花袍勒帛花

靴佩劔護者二人朱白二色純巾二色純生色寶相花

袍勒帛花靴佩劔加弓矢後屏五人執稍紫兜鍪紫甲

右次六列井宿旗第二十六鬼宿旗第二十七柳宿

旗第二十八星宿旗第二十九張宿旗第三十翼宿旗

第三十一軫宿旗第三十二每旗執者一人黃絕巾黃
絕生色寶相花袍勒帛花靴佩劍護者二人朱白二色
絕巾二色絕生色寶相花袍勒帛花靴佩劍加弓矢後
屏五人執稍朱兜鍪朱甲

宮內導從

警蹕三人以控鶴衛士為之並列而前行掌鳴其鞭以
警眾

服見前

天武二人執金鉞分左右行金兜鍪金甲

威金素汗膊金束帶綠雲靴 舍人二人服視四品

主服御者凡三十人

舒庫爾
齊七

執骨朶二人執幢二人執

節二人皆分左右行攜金盆一人由左負金椅一人由

右攜金水瓶鹿盧二人由左執巾一人由右捧金香毬

二人捧金香合二人皆分左右行捧金唾壺一人由左

捧金唾盃一人由右執金拂四人執升龍扇十人皆分

左右行冠交角幘頭服紫羅窄袖衫塗金束帶烏靴

劈正斧官一人由中道近侍重臣攝之侍儀使四人分

左右行佩弓矢十人

國語曰
和爾齊

分左右由外道行服如

主服御者

佩寶刀十人

國語曰伊勒都齊

分左右行冠鳳翅

唐巾服紫羅辦線襖金束帶烏鞞

中宮導從

舍人二人引進使一人中政院判二人同簽中政院事
二人簽中政院事二人中政院副使二人同知中政院
事二人中政院使二人皆分左右行各服其本品公服
內侍二人分左右行服視四品 押直二人冠交角幘
頭紫羅窄袖襖塗金束帶烏靴小內侍凡九人執骨朶

二人執葆蓋四人皆分左右行執纛一人由中道行攜
金盃一人由左負金椅一人由右服紫羅團花窄袖衫
冠帶靴如押直 中政使一人由中道捧外辦象牌服
本品朝服 宮人凡二十二人攜水瓶金鹿盧一人由
右執銷金淨巾一人由左捧金香毬二人捧金香合二
人分左右捧金唾壺一人由左捧金唾盂一人由右執
金拂四人執雉扇十人各分左右行冠鳳翅縷金帽銷
金緋羅襖銷金緋羅結子銷金緋羅繫腰紫羅衫五色

嵌金黃雲肩瓘玉束帶

班序

先期待儀使糾庀陳設 殿內兩楹北香案二 殿門
內殿內將軍版位二其外殿外將軍版位二字下斜界
護尉版位二軒溜前斜外出畫內蓮六右點檢版位三
左宣徽版位三蓮南一步橫列鳴鞭版位三左右階南
兩隅天武版位二字下左右第二第三重斜界導從版
位二 殿東門兩碩斜界出導從二道三層各圈十五

先扇錡各五寶蓋錡各二 殿東階下各圍十直至東
門階下為回倒導從位 正階下二十四甃香案一護
尉席內各祀迤內第四壙首取直邊北左右護尉第五
席相向布席北二席宿直次殿中次典瑞次起居每席
函丈五尺設殿前版位八各以左右祀道內邊丹墀迤
內第五甃縱直北空路五丈五尺東西走路各遠四丈
九尺中布席四十席函九尺設護尉版位二 輦路東西
各五道表二丈一仞五寸南北二道廣丈有奇北至道

當中第一北三南一自兩端各函六丈第二北起十一
各函丈咫南起九各函丈三尺第三北起十三各函丈
五尺南起十二各函丈五寸第四北起十六各函丈二
尺南起十四各函九尺第五北起同上南起十各函八
尺北頭曲尺路內四各函九尺設黃麾仗錡二百二十
仗南畫闌約丈許左右同中央置席設尚殿版位二
仗內丹墀橫界一十八道道函五尺縱引橫引三丈中
設九品版位一十八尚殿南左右縱畫各一十八道道

函仞左右向設起居旁折版位三十六以內為上 大
明門中兩楹外斜界二道護尉版位二外設管旗版位
二門下左右闕邊各六丈南北各畫一道廣一引七丈
一仞六寸空各二丈一仞內橫二引二丈五寸空各三
丈五尺每錡後丈五尺屏風渠一道長五尺錡各遠四
壁丈五尺設牙旗錡七十四闕下兩觀內各六丈縱各
界一十八道道遠仞左右設外序班版位三十六自序
班北入闕左右門邊兩外仗往北折西至月華門東至

日精門道中央入至起居旁折界一道導引

元史卷八十

元史卷八十考證

視班內如右左輦路 右訛左下句左訛右今據殿前

入班圖改承傳贊席前上脫在字據明殿版位圖增

天王旗第六 白虎旗以下原本闕天王旗一條今按

續集禮補入又按集禮及經世大典鐙仗下加次斧

一列句第五南起下加十字曲尺路內下加四字

欽定四庫全書蒼要卷六千四百六十史部

元史卷八十一

明翰林學士亞中大夫知制誥兼修國史宋濂等修

志第三十一

選舉一

選舉之法尚矣成周庠序學校以鄉三物教萬民而賓興之舉於鄉升於司徒司馬論定而後官之兩漢有賢良方正孝弟力田等科或奉對詔策事猶近古隋唐有

秀才明經進士明法明算等科或兼用詩賦士始有棄本而逐末者宋大興文治專尚科目雖當時得人為盛而其弊遂至文體卑弱士習委靡識者病焉遼金居北方俗尚弓馬遼景宗道宗亦行貢試金太宗世宗屢闢科場亦麤稱得士元初太宗始得中原輒用耶律楚材言以科舉進士世祖既定天下王鶚獻計許衡立法事未果行至仁宗延祐間始斟酌舊制而行之取士以德行為本試藝以經術為先士裒然舉首應上所求者皆

彬彬輩出矣然當時仕進有多歧銓衡無定制其出身於學校者有國子監學有蒙古字學回回國學有醫學有陰陽學其策名於薦舉者有遺逸有茂異有求言有進書有童子其出於宿衛勲臣之家者待以不次其用於宣徽中政之屬者重為內官文廕敘有循常之格而超擢有選用之科由直省侍儀等入官者亦名清望以倉庾賦稅任事者例視冗職捕盜者以功敘入粟者以貨進至工匠皆入班資而輿隸亦躋流品諸王公主寵

以投下俾之保任遠夷外徼授以長官俾之世襲凡若此類殆所謂吏道雜而多端者歟矧夫儒有歲貢之名更有補用之法曰掾史令史曰書寫銓寫曰書吏典吏所設之名未易枚舉曰省臺院部曰路府州縣所入之途難以指計雖名卿大夫亦往往由是躋要官受顯爵而刀筆下吏遂致竊權勢舞文法矣故其銓選之備考覈之精曰隨朝外任曰省選部選曰文官武官曰考數曰資格一毫不可越而或援例或借資或優陞或回降

其縱情破律以公濟私非至明者不能察焉是皆文繁
吏弊之所致也今採摭舊編載於簡牘或詳或畧條分
類聚殆有不勝其紀述者姑存一代之制作選舉志

科目

太宗始取中原中書令耶律楚材請用儒術選士從之
九年秋八月下詔令斷事官札哈岱與山西東路課稅
所長官劉中厯諸路考試以論及經義詞賦分為三科
作三日程專治一科能兼者聽但以不失文義為中選

其中選者復其賦役令與各處長官同署公事得東平楊英等凡若干人皆一時名士而當世或以為非便事復中止世祖至元初年有旨命丞相史天澤條其當行大事嘗及科舉而未果行四年九月翰林學士承旨王鶚等請行選舉法遠述周制次及漢隋唐取士科目近舉遼金選舉用人與本朝太宗得人之効以為貢舉法廢士無入仕之階或習刀筆以為吏胥或執僕役以事官僚或作技巧販鬻以為工匠商賈以今論之惟科舉

取士最為切務矧先朝故典尤宜追述奏上帝曰此良法也其行之中書左三部與翰林學士議立程式又請依前代立國學選蒙古人諸職官子孫百人專命師儒教習經書俟其藝成然後試用庶幾勲舊之家人材輩出以備超擢十一年十一月裕宗在東宮時省臣復啟謂去年奉旨行科舉今將翰林老臣等所議程式以聞奉令旨准蒙古進士科及漢人進士科參酌時宜以立制度事未施行至二十一年九月丞相和爾果斯與留

夢炎等言十一月中書省臣奏皆以為天下習儒者少而由刀筆吏得官者多帝曰將若之何對曰惟貢舉取士為便凡蒙古之士及儒吏陰陽醫術皆令試舉則用心為學矣帝可其奏繼而許衡亦議學校科舉之法罷詩賦重經學定為新制事雖未及行而選舉之制已立至仁宗皇慶二年十月中書省臣奏科舉事世祖裕宗累嘗命行成宗武宗尋亦有旨今不以聞恐或有沮其事者夫取士之法經學實修己治人之道詞賦乃摛章

繪句之學自隋唐以來取人專尚詞賦故士習浮華今
臣等所擬將律賦省題詩小義皆不用專立德行明經
科以此取士庶可得人帝然之十一月乃下詔曰惟我
祖宗以神武定天下世祖皇帝設官分職徵用儒雅崇
學校為育材之地議科舉為取士之方規模宏遠矣朕
以眇躬獲承丕祚繼志述事祖訓是式若稽三代以來
取士各有科目要其本末舉人宜以德行為首試藝則
以經術為先詞章次之浮華過實朕所不取爰命中書

參酌古今定其條制其以皇慶三年八月天下郡縣興其賢者能者充貢有司次年二月會試京師中選者朕將親策焉具合行事宜于后科場每三歲一次開試舉人從本貫官司於諸色戶內推舉年及二十五以上鄉黨稱其孝悌朋友服其信義經明行修之士結罪保舉以禮敦遣貢諸路府其或徇私濫舉并應舉而不舉者監察御史肅政廉訪司體察究治考試程式蒙古色目人第一場經問五條大學論語孟子中庸內設問用朱

氏章句集註其義理精明文辭典雅者為中選第二場
策一道以時務出題限五百字以上漢人南人第一場
明經經疑二問大學論語孟子中庸內出題並用朱氏
章句集註復以己意結之限三百字以上經義一道各
治一經詩以朱氏為主尚書以蔡氏為主周易以程氏
朱氏為主已上三經兼用古註疏春秋許用三傳及胡
氏傳禮記用古注疏限五百字以上不拘格律第二場
古賦詔誥章表内科一道古賦詔誥用古體章表四六

參用古體第三場策一道經史時務內出題不矜浮藻
惟務直述限一千字以上成蒙古色目人願試漢人南
人科目中選者加一等注授蒙古色目人作一榜漢人
南人作一榜第一名賜進士及第從六品第二名以下
及第二甲皆正七品第三甲以下皆正八品兩榜並同
所在官司遲悞開試日期監察御史肅政廉訪司糾
彈治罪流官子孫廕敘並依舊制願試中選者優陞
一等在官未入流品願試者聽若中選之人已有九

品以上資級比附一高加一等注授若無品級止依試
例從優銓注鄉試處所并其餘條目命中書省議行於
戲經明行修庶得真儒之用風移俗易益臻至治之隆
咨爾多方體予至意中書省行定條目 鄉試中選者
各給解據錄連取中科文行省移咨都省送禮部腹裏
宣慰司及各路關申禮部拘該監察御史廉訪司依上
錄連科文申臺轉呈都省以憑照勘 鄉試八月二十
日蒙古色目人試經問五條漢人南人明經經疑二問

經義一道二十三日蒙古色目人試策一道漢人南人
古賦詔誥章表內科一道二十六日漢人南人試策一
道 會試省部依鄉試例於次年二月初一日試第一
場初三日第二場初五日第三場 御試三月初七日
前期奏委考試官二員監察御史二員讀卷官二員於
殿廷考試每舉子一名集賽岱一人看守漢人南人試
策一道限一千字以上成蒙古色目人時務策一道限
五百字以上成 選考試官行省與宣慰司及腹裏各

路有行臺及廉訪司去處與臺憲官一同商議選差上
都大都從省部選差在內監察御史在外廉訪司官一
員監試每處差考試官同考試官各一員並於見任并
在閑有德望文學常選官內選差彌封官一員謄錄官
官一員廉幹文資正官充之凡謄錄試卷并行移文字
皆用朱書仍須設法關防毋致容私作弊省部會試都
省選委知貢舉同知貢舉官各一員考試官四員監察
御史二員彌封謄錄對讀官監門等官各一員 鄉試

行省一十一河南陝西遼陽四川甘肅雲南嶺北征東
江浙江西湖廣宣慰司二河東山東直隸省部路分四
真定東平大都上都 天下選合格者三百人赴會試
於內取中選者一百人內蒙古色目漢人南人分卷考
試各二十五人蒙古人取合格者七十五人大都十五
人上都六人河東五人真定等五人東平等五人山東
四人遼東五人河南五人陝西五人甘肅三人嶺北三
人江浙五人江西三人湖廣三人四川一人雲南一人

征東一人色目人取合格者七十五人大都十人上都
四人河東四人東平等四人山東五人真定等五人河
南五人四川三人甘肅二人陝西三人嶺北二人遼陽
二人雲南二人征東一人湖廣七人江浙一十人江西
六人漢人取合格者七十五人大都一十人上都四人
真定等十一人東平等九人山東七人河東七人河南
九人四川五人雲南二人甘肅二人嶺北一人陝西五
人遼陽二人征東一人南人取合格者七十五人湖廣

一十八人江浙二十八人江西二十二人河南七人

鄉試會試許將禮部韻略外餘並不許懷挾文字差搜
檢懷挾官一員每舉人一名差軍一名看守無軍人處
差巡軍 提點擗掠試院差廉幹官一員度地安置席
舍務令隔遠仍自試官入院後常川妨職監押外門

鄉試會試彌封謄錄對讀官下吏人於各衙門從便差
設 試卷不考格犯御名廟諱及文理紕繆塗注乙五
十字以上者不考謄錄所承受試卷並用朱書謄錄正

文實計塗注乙字數標寫對讀無差將朱卷逐旋送考
試所如朱卷有塗注乙字亦皆標寫字數謄錄官書押
候考校合格中選人數已定抄錄字號索上元卷請監
試官知貢舉官同試官對號開拆舉人試卷各人自
備三場文卷并草卷各一十二幅於卷首書三代籍貫
年甲前期半月於印卷所投納置簿收附用印鈐縫訖
各選舉人凡就試之日日未出入場黃昏納卷受卷
官送彌封所撰字號彌封訖送謄錄所科舉既行之

後若有各路歲貢及保舉儒人等文字到官並令還赴本鄉應試 倡優之家及患廢疾若犯十惡奸盜之人

不許應試 舉人於試場內毋得喧譁違者治罪仍殿

二舉 舉人與考試官有五服內親者自須迴避仍令同試官考卷若應避而不自陳者殿一舉 鄉試會試

若有懷挾及令人代作者漢人南人有居父母喪服應舉者並殿二舉 國子監學歲貢生員及伴讀出身並依舊制願試者聽中選者於監學合得資品上從優銓

注 別路附籍蒙古色目漢人大都上都恒產住經
年深者從兩都官司依上例推舉就試其餘去處冒貫
者治罪

知貢舉以下官會集至公堂議擬合行事目云 諸輒
於彌封所取問舉人試卷封號姓名及漏泄者治罪諸
試題未出而漏泄者許人告首諸對讀試卷官不躬親
而輒令人吏對讀其對讀訖而差誤有礙考校者有罰
諸謄錄人書寫不慎及錯誤有礙考校者重示責罰諸

官司故縱舉人私將試卷出院及祇應人知而為傳送者許人告首諸監試官掌試院事不得干預考校諸試院官在簾內者不許與簾外官交語諸色人無故不得入試廳諸舉人謗毀主司率衆喧競不服止約者治罪諸舉人就試無故不冠及擅移坐次者或偶與親姻隣坐而不自陳者懷挾代筆傳義者並扶出諸折毀試卷首家狀者推治諸舉人於試卷書他語者駁放涉謗訕者推治諸試日為舉人傳送文書及因而受財者並許

人告諸舉人於別紙上起草者出榜退落諸科文內不得自敘苦辛門第委騰錄所點檢得如有違犯更不騰錄移文考試院出榜退落諸冒名就試別立姓名及受財為人懷挾代筆傳義者並許人告諸被黜而妄訴者治罪諸監門官譏察出入其物應入者拆封點檢諸巡捕官及兵役不得喧擾及輒視試文并縱容舉人無故往來非因公事不得與舉人私語諸試卷彌封用印訖以三不成字為號標寫仍於塗注乙處用印 每舉人

一名給祇應巡軍一人隔夜入院分宿席房試日擊鐘
為節一次院官以下皆盥漱二次監門官啓鑰舉人入
院搜檢訖就將解據呈納禮生贊曰舉人再拜知貢舉
官隔簾受一拜跪答一拜試官受一拜答一拜鐘三次
頒題就次日午賜膳其納卷者赴受卷所揖而退不得
交語受卷官書舉人姓名于歷舉人揖而退取解據
出院巡軍亦出至晚鳴鐘一次鎖院門第二場舉人入
院依前搜檢每十人一甲序立至公堂下作揖畢頒題

就次第三場如前儀 其受卷官具受到試卷逐旋關

發彌封官將家狀草卷腰封用印蒙古色目漢人南人分
卷以三不成字撰號每名累場同用一號於卷上親書
及於歷內標附訖牒送騰錄官置歷分給吏人並用朱
書騰錄正文仍具元卷塗注乙及騰錄塗注乙字數卷
末書騰錄人姓名騰錄官具銜書押用印鈐縫牒送對
讀所翰林掾史具騰錄訖試卷總數呈報監察御史對
讀官以元卷與朱卷躬親對讀無差具銜書押呈解貢

院元卷發還彌封所各所行移並用朱書試卷照依元號附簿 試官考卷知貢舉居中試官相對向坐公同考校分作三等逐等又分上中下用墨筆批點考校既定收掌試卷官於號簿內標寫分數知貢舉官同試官監察御史彌封官公同取上元卷對號開拆知貢舉於試卷家狀上親書省試第幾名拆號既畢應有試卷並付禮部架閣貢舉諸官出院中書省以中選舉人分為二榜揭于省門之左右 三月初四日中書省奏准以

初七日御試舉人於翰林國史院定委監試官及諸執
事初五日各官入院初六日譔策問進呈俟上采取初
七日執事者望闕設案於堂前置策題於上舉人入院
搜檢訖蒙古人作一甲序立禮生導引至於堂前望闕
兩拜賜策題又兩拜各就次色目人作一甲漢人南人
作一甲如前儀每進士一人差蒙古宿衛士一人監視
日午賜膳進士納卷畢出院監試官同讀卷官以所對
策第其高下分為三甲進奏作二榜用敕黃紙書揭于

內前紅門之左右 前一日禮部告諭中選進士以次

日詣闕前所司具香案侍儀舍人唱名謝恩放榜擇日

賜恩榮宴于翰林國史院押宴以中書省官凡預試官

並與宴預宴官及進士並簪華至所居擇日恭詣殿廷

上謝恩表次日詣中書省參見又擇日諸進士詣先聖

廟行舍菜禮第一人具祝文行事刻石題名於國子監

延祐二年春三月廷試進士賜呼圖克岱爾張起巖

等五十六人及第出身有差 五年春三月廷試進士

呼圖克岱爾霍希賢等五十人 至治元年春三月廷
試進士塔斯布哈宋本等六十四人 泰定元年春三
月廷試進士巴拉張益等八十六人 四年春三月廷
試進士阿恰齊李黼等八十六人 天歷三年春三月
廷試進士圖烈圖王文燧等九十七人 元統癸酉科
廷試進士同同李齊等復增名額以及百人之數稍異
其制左右榜各三人皆賜進士及第其餘出身有差科
舉取士莫盛於斯後三年其制遂罷又七年而復興遂

稍變程式減蒙古色目人明經二條增本經義易漢南
人第一場四書疑一道為本經疑增第二場古賦外於
詔誥章表內又科一道此有元科目取士之制大畧如
此若夫會試下第者自延祐創設之初丞相特們德爾
阿薩爾及平章李孟等奏下第舉人年七十以上者與
從七品流官致仕六十以上者與教授元有出身者於
應得資品上稍優加之無出身者與山長學正受省劄
後舉不為例今有來遲而不及應試者未曾區用取旨

帝曰依下第例恩之勿著為格 泰定元年三月中書省臣奏下第舉人仁宗延祐間命中書省各授教官之職以慰其歸今當改元之初恩澤宜溥蒙古色目人年三十以上并兩舉不第者與教授以下與學正山長漢人南人年五十以上并兩舉不第者與教授以下與學正山長先有資品出身者更優加之不願仕者令備國子員後勿為格從之自餘下第之士恩例不可常得間有試補書吏以登仕籍者惟已廢復興之後其法始

變下第者悉授以路府學正及書院山長又增取鄉試
備榜亦授以郡學錄及縣教諭於是科舉取士得人為
盛焉

學校

世祖至元八年春正月始下詔立京師蒙古國子學教
習諸生於隨朝蒙古漢人百官及集賢館官員選子弟
俊秀者入學然未有員數以通鑑節要用蒙古語言
譯寫教之俟生員習學成效出題試問觀其所對精通

者量授官職成宗大德十年春二月增生員廩餼通前三十員為六十員武宗至大二年定伴讀員四十人在籍上名生員學問優長者補之仁宗延祐二年冬十月以所設生員百人蒙古五十人色目二十人漢人三十人而百官子弟之就學者常不下二三百人宜增其廩餼乃減去庶民子弟一百一十四員聽陪堂學業於見供生員一百名外量增五十名元置蒙古二十人漢人三十人其生員紙扎筆墨止給三十人歲凡二次給

之至元六年秋七月置諸路蒙古字學十二月中書

省定學制頒行之命諸路府官子弟入學上路二人下
路二人府一人州一人餘民間子弟上路三十人下路
二十五人願充生徒者與免一身雜役以譯寫通鑑節
要頒行各路俾肄習之至成宗大德五年冬十月又定
生員散府二十人上中州十五人下州十人元貞元年
命有司割地給諸路蒙古學生員餼廩其學官至元十
九年定擬路府路設教授以國字在諸字之右府州教

授一任准從八品再歷路教授一任准正八品任回本
等遷轉大德四年添設學正一員上自國學下及州縣
舉生員高等從翰林考試凡學官譯史取以充焉

世祖至元二十六年五月尚書省臣言伊斯題喇卜文
字宜施於用今翰林院伊普迪哈魯昂能通其字學乞
授以學士之職凡公卿大夫與夫富民之子皆依漢人
入學之制日肄習之帝可其奏是歲八月始置回回國
子學至仁宗延祐元年四月復置回回國子監設監官

以其文字便於關防取會數目令依舊制篤意頒教奉
定二年春閏正月以近歲公卿大夫子弟與夫凡民之
子入學者衆其學官及生員五十餘人已給飲膳者二
十七人外助教一人生員二十四人廩膳並令給之學
之建置在於國都凡百司庶府所設譯史皆從本學取
以充焉

太宗六年癸巳以馮志常為國子學總教命侍臣子弟
十八人入學世祖至元七年命侍臣子弟十有一人入

學以長者四人從許衡童子七人從王恂至二十四年
立國子學而定其制設博士通掌學事分教三齋生員
講授經旨是正音訓上嚴教導之術下考肄習之業復
設助教同掌學事而專守一齋正錄申明規矩督習課
業凡讀書必先孝經小學論語孟子大學中庸次及詩
書禮記周禮春秋易博士助教親授句讀音訓正錄伴
讀以次傳習之講說則依所讀之序正錄伴讀亦以次
而傳習之次日抽籤令諸生復說其功課對屬詩章經

解史評則博士出題生員具藁先呈助教俟博士既定始錄附課簿以憑考校其生員之數定二百人先令一百人及伴讀二十人入學其百人之內蒙古半之色目漢人半之許衡又著諸生入學雜儀及日用節目七年命生員八十人入學俾永為定式而遵行之成宗大德八年冬十二月始定國子生蒙古色目漢人三歲各貢一人十年冬閏十月國子學定蒙古色目漢人生員二百人三年各貢二人武宗至大四年秋閏七月定生員

額二百人冬十二月復立國子學試貢法蒙古授官六
品色目正七品漢人從七品試蒙古生之法宜從寬色
目生宜稍加密漢人生則全科場之制仁宗延祐二年
秋八月增置生員百人陪堂生二十人用集賢學士趙
孟頫禮部尚書元明善等所議國子學貢試之法更定
之一曰陞齋等第六齋東西相向下兩齋左曰游藝右
曰依仁凡誦書講說小學屬對者隸焉中兩齋左曰據
德右曰志道講說四書課肄詩律者隸焉上兩齋左曰

時習右曰日新講說易詩書春秋科習明經義等程文者隸焉每齋員數不等每季考其所習經書課業及不違規矩者以次遞陞二曰私試規矩漢人驗日新時習兩齋蒙古色目取志道據德兩齋本學舉實厯坐齋二周歲以上未嘗犯過者詳令充試限實厯坐齋三周歲以上以充貢舉漢人私試五月試經疑一道仲月試經義一道季月試策問表章詔誥科一道蒙古色目人孟仲月各試明經一道季月試策問一道辭理俱優者為

上等準一分理優辭平者為中等準半分每歲終通計
其年積分至八分以上者陞充高等生員以四十名為
額內蒙古色目各十名漢人二十名歲終試貢員不必
備惟取實才有分同闕少者以坐齋月日先後多少為
定其未及等并雖及等無闕未補者其年積分並不為
用下年再行積算每月初二日蚤旦圓揖後本學博士
助教公座面引應試生員各給印紙依式出題考試不
許懷挾代筆各用印紙真楷書寫本學正錄彌封謄錄

餘並依科舉式助教博士以次考定次日監官覆考於名簿內籍記各得分數本學收掌以俟歲終通考三曰黜罰科條應私試積分生員其有不事課業及一切違戾規矩者初犯罰一分再犯罰二分三犯除名從學正錄糾舉正錄知見而不糾舉者從本監議罰之應已補高等生員其有違戾規矩者初犯殿試一年再犯除名從學正錄糾舉之正錄知見而不糾舉者亦從本監議罰之應在學生員歲終實厯坐齋不滿半歲者並行除

名除月假外其餘告假並不準算學正錄歲終通行考
校應在學生員除蒙古色目別議外其餘漢人生員三
年不能通一經及不肯勤學者勒令出學其餘責罰並
依舊規泰定三年夏六月更積分而為貢舉並依世祖
舊制其貢試之法從監學所擬大槩與前法畧同而防
閑稍加嚴密焉其本學正錄各二員司樂一員典籍二
員管勾一員及侍儀舍人舊例舉積分生員充之後以
積分既卑於上齋舉年三十以上學行堪範後學者為

正錄通曉音律學業優贍者為司樂幹局通敏者為典籍管勾其侍儀舍人與上中齋舉禮儀習熟音吐洪暢曾掌春秋釋奠每月告朔明贊衆與其能者充之文宗天曆三年春三月惟伴讀員數自初二十人歲貢二人後於大德七年定四十人歲貢六人至大四年定四十人歲貢四人延祐四年歲貢八人為淹滯既額設四十名宜充部令史者四人路教授者四人是後又命所貢生員每大比選士與天下士同試於禮部策於殿廷又

增置備榜而加選擇焉

國初燕京始平宣撫王楫請以金樞密院為宣聖廟太宗六年設國子總教及提舉官命貴臣子弟入學受業憲宗四年世祖在潛邸特命修理殿廷及即位賜以玉帛俾永為祭器至元十三年授提舉學校官六品印遂改為大都路學署曰提舉學校所二十四年既遷都北城立國子學于國城之東迺以南城國子學為大都路學自提舉以下設官有差仁宗延祐四年大興府尹巴

蘓呼重修殿門堂廡建東西兩齋泰定三年府尹曹偉
增建環廊文宗天歷三年復增廣之提舉郝義恭又增
建齋舍自府尹郝都爾本至曹偉始定生員凡百人每
名月餼京畿漕運司及本路給之泰定四年夏四月諸
生始會食于學焉

太宗始定中原即議建學設科取士世祖中統二年始
命置諸路學校官凡諸生進修者嚴加訓誨務使成材
以備選用至元十九年夏四月命雲南諸路皆建學以

祀先聖二十三年二月帝御德興府行宮詔江南學校
舊有學田復給之以養士二十八年命江南諸路學及
各縣學內設立小學選老成之士教之或自願招師或
自受家學於父兄者亦從其便其他先儒過化之地名
賢經行之所與好事之家出錢粟贍學者並立為書院
凡師儒之命於朝廷者曰教授路府上中州置之命於
禮部及行省及宣慰司者曰學正山長學錄教諭路州
縣及書院置之路設教授學正學錄各一員散府上中

州設教授一員下州設學正一員縣設教諭一員書院
設山長一員中原州縣學正山長學錄教諭並受禮部
付身各省所屬州縣學正山長學錄教諭並受行省及
宣慰司劄付凡路府州書院設直學以掌錢穀從郡守
及憲府官試補直學考滿又試所業十篇陞為學錄教
諭凡正長學錄教諭或由集賢院及憲臺等官舉充之
諭縣歷兩考陞正長正長一考陞散府上中州教授上
中州教授又歷一考陞路教授教授之上各省設提舉

二員正提舉從五品副提舉從七品提舉凡學校之事
後改直學考滿為州吏例以下第舉人充正長備榜舉
人充諭錄有薦舉者亦參用之自京學及州縣學以及
書院凡生徒之肄業於是者守令舉薦之台憲考覈之
或用為教官或取為吏屬往往人材輩出矣 世祖中
統二年夏五月太醫院使王猷言醫學久廢後進無所
師授竊恐朝廷一時取人學非其傳為害甚大乃遣副
使王安仁授以金牌往諸路設立醫學其生員擬免本

身檢醫差占等役俟其學有所成每月試以疑難視其所對優劣量加勸懲後又定醫學之制設諸路提舉綱維之凡宮壺所需省台所用轉入常調可任親民其從太醫院自遷轉者不得視此例又以示仕途不可以雜進也然太醫院官既受宣命皆同文武正官五品以上遷敘餘以舊品職遞陞子孫廕用同正班敘其掌藥充都監直長充御藥院副使陞至大使考滿依舊例於流官銓注諸教授皆從太醫院定擬而各路主善亦擬同

教授皆從九品凡隨朝太醫及醫官子弟及路府州縣
學官並須試驗其各處名醫所述醫經文字悉從考校
其諸藥所產性味真偽悉從辨驗其隨路學校每歲出
降十三科疑難題目具呈太醫院發下諸路醫學令生
員依式習課醫義年終置簿解納送本司以定其優劣
焉

世祖至元二十八年夏六月始置諸路陰陽學其在腹
裏江南若有通曉陰陽之人各路官司詳加取勘依儒

學醫學之例每路設教授以訓誨之其有術數精通者每歲錄呈省府赴都試驗果有異能則於司天臺內許令近侍延祐初令陰陽人依儒醫例於路府州設教授一員凡陰陽人皆管轄之而上屬於太史焉

舉遺逸以求隱跡之士擢茂異以待非常之人世祖中統間徵許衡授懷孟路教官詔於懷孟等處選子弟之俊秀者教育之是年又詔徵金進士李冶授翰林學士徵劉因為集賢學士不至又用平章咸寧王額森薦徵

蕭軒不起即授陝西儒學提舉至元十八年詔求前代
聖賢之後儒醫卜筮通曉天文厯數并山林隱逸之士
二十年復召拜劉因右贊善大夫辭不允未幾以親老
乞終養俸給一無所受後遣使授命于家辭疾不起二
十八年復詔求隱晦之士俾有司具以名聞成宗大德
六年徵臨川布衣吳澂擢應奉翰林文字拜命即歸九
年詔求山林間有德行文學識治道者遣使徵蕭軒且
曰或不樂於仕可試一來與朕語而遣歸至大三年復

召吳澄拜國子司業以病還延祐三年召拜集賢直學
士以疾不赴至治三年召拜翰林學士武宗仁宗累徵
蕭顛授集賢學士國子司業未赴改集賢侍講學士又
以太子右諭德徵始至京師授集賢學士國子祭酒諭
德如故仁宗延祐七年十一月詔曰比歲設立科舉以
取人材尚慮高尚之士晦跡邱園無從可致各處其有
隱居行義才德高邁深明治道不求聞達者所在官司
具姓名牒報本道廉訪司覆奏察聞以備錄用又屢詔

求言於下使得進言於上雖指斥時政並無譴責往往
采擇其言任用其人列諸庶位以圖治功其他著書立
言裨益教化啓迪後人者亦斟酌錄用著為常式云

童子舉唐宋始著于科然亦無常員成宗大德三年舉
童子楊山童海童五年大都提舉學校所舉安西路張
秦山江浙行省舉張昇甫武宗至大元年舉武福安仁
宗延祐三年江浙行省舉俞傳孫馮和克六年河南路
舉張達罕學士鄂勒哲布哈舉丁旺溫七年河間縣舉

杜山童大興縣舉陳昉英宗至治元年福州路連江縣
舉陳元麟至治三年河南行省舉張英泰定四年福州
舉葉留畊文宗天厯二年舉杜夙靈至順二年制舉塔
卜台子密拉岱皆以其天資穎悟超出兒輩或能默誦
經文書寫大字或能綴緝辭章講說經史並令入國子
學教育之惟張秦山尤精篆籀陳元麟能通性理葉留
畊問以四書大義則對曰無過事父母能竭其力事君
能致其身時人以遠大期之

元史卷八十一

元史卷八十一考證

選舉志一所入之途難以指計雖名卿大夫亦往往由
是躋要官受顯封 按大夫原刻訛大府今據永樂
大典改

選舉志一諸巡捕官及兵役不得喧擾及輒視試文并
縱容舉人無故往來 按原刻捕訛舖役訛級縱容
二字倒置今據永樂大典改

選舉志一舉人揖而退 按原刻脫舉字今據續通考

增

選舉志一延祐初令陰陽人依儒醫例於路府州設教
授一員 按原刻員字上脫一字今據百官志增





總校官編修臣吳紹深